

fico, quod Richardus Dominus *Le Scrope* & Angliæ Cancellarius sub Richardo Secundo maximis impensis construxit. Iamque in Orientem Solem se agens, *Middelham* oppidum adit, cuius honorem, ut in *Nevillorum* Genealogia legimus, Alanus *Richmondia* Comes fratri juniori \* *Rinebaldo* contulit, cum omnibus terris, quæ ante eorum adventum ad *Gilpatrick* Danum spectarunt. Hujus è filio Radulpho nepos, Robertus *Fitz-Ralph* dictus, *Wentfedale* etiam omnem à Conano Britannia, & *Richmondia* Comite dono accepit, & ad *Middleham* castrum firmissimum excitavit, Ranulphus ejus filius monasterium Canonicis ad *Coverham*, *Corham* nunc contracte dicunt, in *Coverdale* posuit, ejusque filius Ranulphus suscepit Mariam filiam, quæ Roberto Domino *Nevill* enupta, in *Nevillorum* familiam hanc hæreditatem amplissimam quasi dotale patrimonium suis nuptiis transtulit. Qui quidem Robertus *Nevill* cum numerosam prolem ex uxore suscepisset, ignotus in adulterio deprehensus, & ab adulteræ marito in vindictam genitalibus mutilatus, brevi vi doloris expiravit.

*Vrus* deinde, postquam pauca permenfus fuerit milliaria, *Iervis* sive *Iorvallense*, monasterium nunc in ruinas redactum, postea *Masham* respexit, quæ fuit *Scoporum* de *Masham*, qui ut è stirpe *Scoporum* de *Bolton* progerminarunt, ita denuo in eandem conjugio insiti fuerunt. Ad alteram autem fl. ripam, sed magis introrsum, *Snath* sedet Baronum de *Latimer* primaria habitatio, qui clarorum natalium ortum duxerunt à G. *Nevill* filio minori Rad. *Nevill* primi Comitum *Westmorlandia*, qui hunc titulum honorarium ab Hen. Rege ejus nominis Sexto accepit, cum antiquior *Latimerorum* familia in fœmina defuisset, perpetuaque successione ad nostra usque tempora floruerunt. Cum mascula prole postremi Baronis deficiente, lautissima hæreditas inter ejus filias erat divisa, quæ in *Perciorum*, *Ceciliorum*, *D'arversorum*, & *Cornwallis* familias enuptæ fuerunt. Nec alios locos hac in parte memoratu dignos prætervehitur *Vrus*, nisi *Tanfald*, habitationem olim *Gerneganorum* equitum auratorum, à quibus ad *Marmionos* descendit, quorum ultimus Amiciam hæredem reliquit, uxorem secundam Ioannis Domini *Grey* de *Rotherfeld*, cuius duo liberi adsumpto cognomine *Marmion*, matri successerunt, alterque unicam filiam & hæredem reliquit *Elisabetham*, conjugem *Henrici Fitz-Hugh* Baronis inclyti.

*Swalam* deinde à celeritate (ut author est *Th. Spottus*) sic dictum magno aquarum assultu influentem accipit *Vrus*, qui etiam ex Occiduis montibus vix quinq; mille passus supra *Vri* fontes in Ortum defluit: admodum sacer antiquis Anglis, quod in eo, uno die cum Angli primum Christo initiarentur, plusquam decem millia virorum præter feminas, & parvulos à *Paulino* Archiepiscopo *Eboracensi* vitali baptismo festiva lætitia fuerunt regenerati. Devehitur hic *Swala* valle utcunque patenti, quæ inde *Swaldale* nominatur, satis illa quidem graminosa, sed sylvis indiga, primum per *Marricke*, ubi cœnobium ab *Askis*, qui magni olim fuerunt nominis, extructum, & *Mask*, plumbi feracem. Inde *Rich-*  
*Britannia.*

mondiam, vulgo *Richmond*, primariam regionis urbem exiguo mœnium circuitu inclusam, sed perductis ad tres portas suburbiis satis frequentem profundit, quam Alanus primus Comes, cum *Gilling* villæ, sive *Manerio* suo proximo minus confideret, contra Anglorum & Danorum impetus, quos Normanni hæreditate spoliarunt, condidit, hoc nomine quasi *Divitem Montem* ornavit, mœnibus & castro firmissimo præmunit, quod rupi impositum ex alto *Swalam* vasto cum murmure inter saxa ruentem potius quam fluentem despicit. Erat enim villa illa *Gilling* religione magis sancta, quam munitione firma, ex quo, in hac (quam *Beda* *Getbling* vocavit) *Oswius* *Nordanhumborum* Rex hospitis infidiis interfectus fuerat, cuius ad cædem expiandam ædificatum erat monasterium, quod in summo honore est à majoribus nostris habitum. Magis ad Septentrionem *Ravenstath* castrum satis magno, sed ruentem mœnium ambitu se ostendit, quod Barones suos *Fitz-Hugh* dictos ex antiqua Anglorum stirpe habuit, qui loci Domini fuerunt ante Normannorum victoriam, & claruerunt usque ad *Henrici V II* tempora, magnis possessionibus ex nuptiis cum hæredibus familiarum illustrium de *Furneux*, & *Marmion* locupletati, quæ ad *Fienes* Dominos *Dacre* in Austro, & *Paros* per fœminas tandem devenerunt.

Tribus infra *Richmondiam* mill. pass. *Swala* vetustam illam urbem præterfluit, quam *Ptolemæus* & *Antoninus* CATVRACTONIVM & CATARRACTON dicunt, *Beda* autem *Catarracton*, & alibi *Vicum juxta Catarractam*, unde à *Catarractis* nomen illud inditum existimo, cum *Catarracta* juxta sit, sed propius *Richmondia*, ubi occurrantibus scopulis per dirupta aquis contractis ruit, ut dixi, potius quam fluit *Swala*. Et cur ille *Vicum juxta Catarractam* diceret, si ibi non esset fluminis *Catarracta*? Urbem illis temporibus celeberrimam fuisse, ex *Ptolemæo* colligatur, quod ibi cœlestis observatio facta fuerit: nam & *Magnæ Constructionis* lib. I I cap. V I Parallelum quartum & vigesimum per *Britanniæ* *Catarractonium* describit, distareque ab *Æquatore* partibus LVII facit, at in *Geographicis* longissimum diem horis XVIII *Æquinoctialibus* definit, ut juxta suum ipsius *Ἐπιτομὴν* LVIII partibus distet. Hodie vero, ut inquit ille, magnum nil nisi nomen habet. Viculus enim est pertenuis, *Catarricke*, & *Catarrick-bridge* dictus, notus tamen & suo ad militarem illam Romanorum viam situ, quæ hic flumen transit, & rudetis inde dispersis, quæ nonnullam vetustatis faciem præ se ferunt, præsertim ad *Ketter-cikswart*, & *Burghale*, quæ sunt à ponte paulo remotiora, & magis ad Ortum proxime flumen, ubi magnam molem quatuor quasi propugnaculis in magnam altitudinem maximo labore aggestam contemplati sumus. Quid olim à *Pictis* & *Saxonibus* pertulerit, cum illi *Britanniæ* urbes ferro & flamma fœdarent, nihil certi habemus, confirmato autem *Saxonico* imperio, floruisse videtur, (licet *Beda* vicum ubique vocet, donec anno *Salutis* DCCCLXIX ab *Æanredo*, sive *Beanredo* tyranno, qui *Nordanhumborum* regnum convulsit, incensa deflagravit. Sed & ille statim misere incendio periit, &

Richmond.

Gilling.

Ravenstath, Barones Fitz-Hugh.

Catarractonium. Catarricke.

Catarrick-bridge.